

四庫全書

集部

欽定四庫全書

白氏長慶集卷三十

唐白居易撰

格詩

凡四十
七首

題裴晉公女几山刻石詩後

并序

裴侍中晉公出討淮西時過女几山下刻石題詩末句
云待平賊壘報天子莫指仙山示武夫果如所言剋期
平賊由是淮蔡迄今底寧殆二十年人安生業夫嗟歎

不足則詠歌之故居易作詩二百言繼題公之篇末欲使採詩者修史者後之往來觀者知公之功德本末前後也

何處畫功業何處題詩篇麒麟高閣上女几小山前爾後多少時四朝二十年賊骨化為土賊壘犁為田一從

賊壘平陳蔡民晏然驪軍成牛戶

蔡冠號驪子軍陳蔡間農驍銳者人畜牛

皆呼為牛戶

鬼火變人煙生子已嫁娶種桑亦絲綿皆云公

之德欲報無由緣公今在何處守都鎮三川舊宅留永

樂新居開集賢公今在何官被袞珥貂蟬戰袍破猶在
髀肉生欲圓襟懷轉瀟灑氣力彌精堅登山不拄杖上
馬能掉鞭利澤浸入地福降自昇天昔號天下將今稱
地上仙勿追赤松遊勿拍洪崖肩商山有遺老可以奉
周旋

洛陽有愚叟

洛陽有愚叟白黑無分別浪跡雖似狂謀身亦不拙點
檢盤中飯非精亦非糲

郎達切

點檢身上衣無餘亦無闕

天時方得所不寒復不熱體氣正調和不飢仍不渴閒
將酒壺出醉向人家歇野食或烹鮮寓眠多擁褐抱琴
榮啓樂荷鋪劉伶達放眼看青山任頭生白髮不知天
地內更得幾年活從此到終身盡為閒日月

飽食閒坐

紅粒陸渾稻白鱗伊水魴庖童呼我食飯熟魚鮮香筋
筋適我口匙匙充我腸八珍與五鼎無復心思量捫腹
起盥漱下階振衣裳遶亭行數匝却上簷下床箕踞擁

裹坐半身在日暘可憐飽暖味誰肯來同嘗是歲太和
八兵銷時漸康朝廷重經術草澤搜賢良堯舜求理切
夔龍啓沃忙懷才抱智者無不走遑遑唯此不才叟頑
慵戀洛陽飽食不出門閒坐不下堂子弟多寂寞僮僕
少精光衣食雖充給神意不揚揚為爾謀則短為吾謀
甚長

閒居自題

門前有流水牆上多高樹竹逕遶荷池紫迴百餘步波

閒戲魚鼈風靜下鷗鷺寂無城市喧渺有江湖趣吾廬
在其上偃臥朝復暮洛下安一居山中亦慵去時逢過
客愛問是誰家住此是白家翁閉門終老處

覽鏡喜老

今朝覽明鏡鬚鬢盡成絲行年六十四安得不衰羸親
屬惜我老相顧興歎咨而我獨微笑此意何人知笑罷
仍命酒掩鏡捋白髭爾輩且安坐從容聽我詞生若不
足戀老亦何足悲生若苟可戀老即生多時不老即須

天不夭即須衰晚衰勝早夭此理決不疑古人亦有言
浮生七十稀我今欠六歲多幸或庶幾儻得及此限何
羨榮啓期當喜不當歎更傾酒一卮

風雪中作

歲暮風動地夜寒雪連天老夫何處宿煖帳溫鑪前兩
重褐綺衾一領花叢蘊粥熟呼不起日高安穩眠是時
心與身了無閒事牽以此度風雪閒居來六年忽思遠
遊客復想早朝士跼凍侵夜行凌寒未明起心為身君

金史卷三十一
父身為心臣子不得身自由皆為心所使我心既知足
我身自安止方寸語形骸我應不負爾

對琴酒

西窓明且暖晚坐卷書帷琴匣拂開後酒瓶添滿時角
樽白螺盞玉軫黃金徽未及彈與酌相對已依依泠泠
秋泉韻貯在龍鳳池油油春雲心一杯可致之自古有
琴酒得此味者稀祇應康與籍及我三心知

雪中晏起偶詠所懷兼呈張常侍韋庶子皇甫

郎中雜言

窮陰蒼蒼雪雰雰雪深沒脛泥埋輪東家典錢歸礙夜
南家貰米出凌晨我獨何者無此弊複帳重衾暖若春
怕寒故懶不肯動日高睡足方頻伸瓶中有酒鑪有炭
甕中有飯庖有薪奴溫婢飽身晏起致茲快活良有因
上無臯陶伯益廊廟材的不能匡君輔國活生民下無
巢父許由箕颺操又不能食薇飲水自苦辛君不見南
山悠悠多白雲又不見西京浩浩唯紅塵紅塵開熱白

雲冷好於冷熱中間安置身三年徵倖忝洛尹兩任優
穩為商賓非賢非愚非智慧不貴不富不賤貧冉冉老
去過六十騰騰閒來經七春不知張韋與皇甫私喚我
作何如人

和裴侍中南園靜興見示

池館清且幽高懷亦如此有時簾動風盡日橋照水靜
將鶴為伴閒與雲相似何必學留侯崎嶇覓松子

春寒

今朝春氣寒自問何所欲酥煖薤白酒乳和地黃粥豈
唯厭饑口亦可調病腹助酌有枯魚佐殮魚旨蓄省躬
念前哲醉飽多慚忸君不聞靖節先生樽長空廣文先
生飯不足

菩提寺上方晚望香山寺寄舒員外

晚登西寶刹晴望東精舍反照轉樓臺輝輝似圖畫冰
浮水明滅雪壓松偃亞石閣僧上來雲汀鴈飛下西京
開於市東洛間如社曾憶舊遊無香山明月夜

二月一日作贈韋七庶子

園杏紅萼拆庭蘭紫芽出不覺春已深今朝二月一去
冬病瘡痂將養遵醫術今春入道場清淨依僧律嘗聞
聖賢語所慎齋與疾遂使愛酒人停盃一百日明朝二
月二疾平齋復畢應須挈一壺尋花覓韋七

犬鷺

晚來天氣好散步中門前門前何所有偶覩犬與鷺鷺
飽凌風飛犬暖向日眠腹舒穩貼地翅凝去聲高摩天上

無羅弋憂下無羈鎖牽見彼物遂性我亦心適然心適
復何為一詠逍遙篇此仍著於適尚未能忘言

夢劉二十八因詩問之

昨夜夢夢得初覺思踟躕忽忘來汝郡猶疑在吳都吳
都三千里汝郡二百餘非夢亦不見近與遠何殊尚能
齊近遠焉用論榮枯但問寢與食近日兩何如病後能
吟否春來曾醉無樓臺與風景汝又何如蘇相思一相
報勿復慵為書

閒吟

貧窮汲汲求衣食富貴營營役心力人生不富即貧窮
光陰易過閒難得我今幸在窮富間雖在朝廷不入山
看雪尋花翫風月洛陽城裏七年閒

西行

衣裘不單薄車馬不羸弱藹藹三月天閒行亦不惡壽
安流水館硤石青山郭官道柳陰陰行宮花漠漠常開
俗間語有錢在處樂我雖非富人亦不苦寂寞家僮解

絃管騎從攜盃杓時向春風前歇鞍開一酌

東歸

翩翩平肩輿中有醉老夫膝上展詩卷竿頭懸酒壺食
宿無定程僕馬多緩驅臨水歇半日望山傾一盃藉草

坐崑嵒

並上聲

攀花行踟躕風將景共暖體與心同舒始

悟有營者居家如在途方知無繫者在道如安居前夕

宿三堂

三堂在號

今日游申湖

申湖在陝

殘春三百里送我歸東

都

途中作

早起上肩輿一盃平旦醉晚憇下肩舁一覺殘春睡身
不經營物心不思量事但恐綺與里只如吾氣味

小臺

新樹低如帳小臺平如掌六尺白藤牀一莖青竹杖風
飄竹皮落苔印鶴迹上幽境與誰同閒人自來往

睡後茶興憶楊同州

昨晚飲太多嵬峩並上聲連宵醉今朝飧又飽爛熯移時

睡睡足摩挲眼眼前無一事信脚遶池行偶然得幽致
婆娑綠陰樹斑駁青苔地此處置繩牀傍邊洗茶器白
瓷甌甚潔紅鑪炭方熾沫下麴塵香花浮魚眼沸盛來
有佳色嚙罷餘芳氣不見楊幕巢誰人知此味

題文集櫃

破柏作書櫃櫃牢柏復堅收貯誰家集題云白樂天我
生業文字自幼及老年前後七十卷小大三千篇誠知
終散失未忍遽棄捐自開自鑰閉置在書帷前身是鄧

伯道世無王仲宣只應分付女留與外孫傳

早熱二首

彤雲散不雨赫日吁可畏端坐猶揮汗出門豈容易忽
思公府內青衫折腰吏復想驛路中紅塵走馬使征夫
更辛苦逐客彌顛顚日入尚趨程宵分不遑寐安知北
窓叟偃臥風颯悉合切又音立至簾拂碧龍鱗扇搖白鶴翅豈
唯身所得兼示心無事誰言苦熱天元有清涼地

勃勃旱塵氣炎炎赤日光飛禽颭將墜行人渴欲狂壯

者不耐飢飢火燒其腸肥者不禁熱喘急汗如漿此時
方自悟老瘦亦何妨肉輕足健逸髮少頭清涼薄食不
飢渴端居省衣裳數匙梁飯冷一領綃衫香持此聊過
日焉知畏景長

偶作二首

戰馬春放歸農牛冬歇息何獨徇名人終身役心力來
者殊未已去者不知還我今悟已晚六十方退閒猶勝
不悟者老死紅塵間

名無高與卑未得多健羨事無小與大已得多厭賤如
此常自苦反此或自安此理知甚易此道行甚難勿信
人虛語君當事上看

池上作

西溪南潭皆
池中勝處也

西溪風生竹森森南潭萍開水沉沉叢翠萬竿湘岸色
空碧一泊松江心浦派縈迴誤遠近橋島向背迷窺臨
澄瀾方丈若萬頃倒影咫尺如千尋泛然獨遊邈然坐
坐念行思思古今菟裘不聞有泉沼西河亦恐無雲林

豈如白翁退老地樹高竹密池塘深華亭雙鶴白矯矯
太湖四石青岑岑眼前盡日更無客膝上此時唯有琴
洛陽冠蓋自相索誰肯來此同抽簪

何處堪避暑

何處堪避暑林間背日樓何處好追涼池上隨風舟日
高飢始食食竟飽還遊遊罷睡一覺覺來茶一甌眼明
見青山耳醒聞碧流脫襪閒濯足解巾快搔頭如此來
幾時已過六七秋從心至百骸無一不自由拙退是其

分榮耀非所求雖被世間笑終無身外憂此語君莫怪
靜思吾亦愁如何三伏月楊尹謫虔州

詔下

昨日詔下去罪人今日詔下得賢臣進退者誰非我事
世間寵辱常紛紛我心與世兩相忘時事雖聞如不聞
但喜今年飽飯喫洛陽禾稼如秋雲更傾一樽歌一曲
不獨忘世兼忘身

七月一日作

七月一日天秋生履道里閒居見清景高興從此始林
間暑雨歇池上涼風起橋竹碧鮮鮮岸莎青靡靡蒼然
古磐石清淺平流水何言中門前便是深山裏雙僮侍
坐臥一杖扶行止飢聞麻粥香渴覺雲湯美

胡麻粥
雲母湯平

生所好物今日多在此此外更何思市朝心已矣

開襟

開襟何處好竹下池邊地餘熱體猶煩早涼風有味黃
萎槐藥結紅破蓮芳墜無奈每年秋先來入衰思

自賓客遷太子少傅分司

頭上漸無髮耳間新有毫形容逐日老官秩隨年高優
饒又加俸閒穩仍分曹飲食免藜藿居處非蓬蒿何言
家尚貧銀榼提綠醪勿謂身未貴金章照紫袍誠合知
止足豈宜更貪饕默然心自問於國有何勞

自在

杲杲冬日光明暖真可愛移榻向陽坐擁裘仍解帶小
奴搥我足小婢搥我背自問我為誰胡然獨安泰安泰

良有以與君論梗槩心了事未了飢寒迫於外事了心未了念慮煎於內我今實多幸事與心和會內外及中間了然無一礙所以日陽中向君言自在

詠史

九年十一月作

秦磨利刀斬李斯齊燒沸鼎烹鄺其可憐黃綺入商洛
閒臥白雲歌紫芝彼為蒞醢机上盡此作鸞鳳天外飛
去者逍遙來者死乃知禍福非天為

因夢有悟

交友淪歿盡悠悠勞夢思平生所厚者昨夜夢見之夢

中幾許事枕上無多時款曲數盃酒從容一局碁

碁酒皆夢

中所見事初見韋尚書

景弘

金紫何輝輝中遇李侍郎

建

笑言

甚怡怡終為崔常侍

亮

意色苦依依一夕三改變夢心

不驚疑此事人盡怪此理誰得知我粗知此理聞於竺

乾師識行妄分別智隱迷是非若轉識為智菩提其庶

幾

春遊

上馬臨出門出門復逡巡
迴頭問妻子應怪春遊頻
誠知春遊頻其奈老大身
朱顏去復去白髮新更新
請君屈十指為我數交親
大限年百歲幾人及七旬
我今六十五走若下坂輪
假使得七十祇有五度春
逢春不遊樂但恐是癡人

題天竺南院贈開元旻清四上人

雜芳閒草合繁綠巖樹新
山深景候晚四月有餘春
竹寺過微雨石逕無纖塵
白衣一居士方袍四道人
地是

佛國土人非俗交親城中山下別相送亦殷勤

哭師臯

南康丹旆引魂迴洛陽籃舁

雲俱切

送葬來北邙原邊草

樹畔月苦煙愁夜過半妻孥兄弟號一聲十二人腸一

時斷往者何人送者誰樂天哭別師臯時平生分義向

人盡今日哀冤唯我知我知何益徒垂淚籃輿迴竿馬

迴轡何日重聞掃市歌誰家收得琵琶妓

師臯醉後善歌掃市詞又

有小妓工琵琶不

蕭蕭風樹白楊影蒼蒼露草青萬氣

知今落在何處

更就墳邊哭一聲與君此別終天地

隱几贈客

宦情本淡薄年貌又老醜紫綬與金章於予亦何有有
時獨隱几塔音然無所偶臥枕一卷書起嘗一盃酒書
將引昏睡酒用扶衰朽客到忽已酣脫巾坐搔首疎頑
倚老病容怨慙交友忽思莊生言亦擬鞭其後

夏日作

葛衣疎且單紗帽輕復寬一衣與一帽可以過炎天止

於便吾體何必被羅紈宿雨林笋嫩晨露園葵鮮烹葵
炮嫩笋可以備朝飧止於適吾口何必飫腥羶飯訖盥
漱已捫腹方果然婆娑庭前步安穩窻下眠外養物不
費內歸心不煩不費用難盡不煩神易安庶幾無夭閔
阿葛得以終天年

晚涼偶詠

日下西牆西風來北窻北中有逐涼人單牀獨棲息飄
蕭過雲雨搖曳歸飛翼新葉多好陰初筠有佳色幽深

小池館優穩閒官職不愛勿復論愛亦不易得

酬牛相公宮城早秋寓言見示兼呈夢得時夢
得有疾

七月中氣後金與火交爭一聞白雪唱暑退清風生碧
樹未搖落寒蟬始悲鳴夜涼枕簟滑秋燥衣巾輕疎受
老慵出劉楨疾未平何人伴公醉新月上宮城

小臺晚坐憶夢得

汲泉灑小臺臺上無纖埃解帶面西坐輕襟隨風開晚

涼閒興動憶同傾一五月明候柴戶藜杖何時來

種桃歌

食桃種其核一年核生芽二年長枝葉三年桃有花憶
昨五六歲灼灼盛芬華迨茲八九載有減而無加去春
已稀少今春漸無多明年後年後芳意當如何命酒樹
下飲停盃拾餘葩因桃忽自感悲吒成狂歌


狂言示諸姪

世欺不識字我忝攻文筆世欺不得官我忝居班秩人

老多病苦我今幸無疾人老多憂累我今婚嫁畢心安
不移轉身泰無牽率所以十年來形神閒且逸況當垂
老歲所要無多物一裘煖過冬一飯飽終日勿言舍宅
小不過寢一室何用鞍馬多不能騎兩匹如我優幸身
人中十有七如我知足人中百無一傍觀愚亦見當
已賢多失不敢論他人狂言示諸姪

偶以拙詩數首寄呈裴少尹侍郎蒙以盛製四
篇一時酬和重投長句美而謝之

投君之文甚荒蕪數篇價直一束芻報我之章何璀璨
累累四貫驪龍珠毛詩三百篇後得文選六十卷中無
一康麗龜絕報賽五鹿連柱難支梧高興獨因秋日盡
清吟多與好風俱銀鈎金錯兩殊重宜上屏風張座隅



白氏長慶集卷三十

欽定四庫全書

集部

白氏長慶集卷三十一

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官庶吉士_臣吳裕德

謄錄監生_臣湯師錫

謄錄監生_臣沈希曾

欽定四庫全書

白氏長慶集卷三十一

唐白居易撰

律詩

凡一百首

六年冬暮贈崔常侍晦

叔時為河南尹

鬢毛霜一色
光景水爭流
易過唯冬日
難銷是老愁
香開綠蟻酒
煖擁褐綾裘
已共崔君約
樽前倒即休

戲招諸客

金人詩話卷三十一
黃醅

鋪不切

綠醅

私呂切

迎冬熟絳帳紅鑪逐夜開誰道洛

中多逸客不將書喚不曾來

十二月二十三日作蕪呈晦叔

案頭歷日雖未盡向後唯殘六七行牀下酒瓶雖不滿
猶應醉得兩三場病身不許依年老拙宦虛教逐日忙
聞健偷閒且勤飲一杯之外莫思量

七年元日對酒五首

慶弔經過懶逢迎跪拜遲不因時節日豈覺此時衰

衆老憂添歲余衰喜入春年開第七秩屈指幾多人

三杯藍尾酒一櫟

戈沛切

膠牙餠

徐盈切

除却崔常侍無人

共我爭

今朝吳與洛相憶一欣然夢得君知否俱過本命年

余與

蘇州劉郎中同壬子歲今年六十二

同歲崔何在同年杜又無

余與吏部崔相公甲子同歲與循州杜相公及第同年秋

冬二人俱逝

應無藏避處只有且歡娛

七年春題府廳

卷三十一
潦倒守三川因循涉四年推誠廢鈎距示恥用蒲鞭以此稱公事將何銷俸錢雖非好官職歲久亦妨賢

早春醉吟寄太原令狐相公蘇州劉郎中

雪夜閒遊多秉燭花時斲出亦提壺別來少遇新詩敵老去難逢舊飲徒大振威名降北虜勤行惠化活東吳不知歌酒騰騰興得似河南醉尹無

洛下送牛相公出鎮淮南

北闕至東京風光十六程坐移丞相閣春入廣陵城紅

旆擁雙節白鬚無一莖萬人開路看百吏立班迎閭外

君彌重樽前我亦榮何須身自得將相是門生

元和初牛相公

應制策登第三等
予為翰林考數官

箏

雲髻飄蕭綠花顏旖旎紅雙眸剪秋水十指剥春蔥楚

艷為門閥秦聲是女工甲鳴銀玦

丁歷郎狄切

柱觸玉

玲瓏援苦啼嫌月鸞嬌語訕

乃禮切

風移愁來手底送恨

入絃中趙瑟清相似胡琴鬧不同慢彈迴斷鴈急奏轉

卷三十一
飛蓬霜珮鏘還委冰泉咽復通珠聯千拍碎刀截一聲
終倚麗精神定矜能意態融歇時情不斷休去思無窮
燈下青春夜樽前白首翁且聽應得在老耳未多聾

洛中春遊呈諸親友

莫數年將暮須憐歲又新府中三遇臘洛下五逢春
樹花珠顆春塘水翅塵春娃無氣力春馬有精神

詠春遊一

時之並轡鞭徐動連盤酒慢巡經過舊鄰里追逐好交
親笑語銷閒日酣歌送老身一生歡樂事亦不少於人

酬舒三員外見贈長句

自請假來多少日
五旬光景侶須臾
已判到老為狂客
不分當春作病夫
楊柳花飄新白雪
櫻桃子綴小紅珠
頭風不敢多多飲
能酌三分相勸無

將歸一絕

欲去公門返野扉
預思泉竹已依依
更憐家醞迎春熟
一甕醞醕待我歸

罷府歸舊居

自此後重授賓客
歸履道宅作

陋巷乘籃入朱門挂印迴腰間拋組綬纓上拂塵埃屈
曲閒池沼無非手自開青蒼好竹樹亦是眼看栽石片
擡琴匣松枝閣酒杯此生終老處昨日却歸來

睡覺偶吟

官初罷後歸來夜天欲明前睡覺時起坐思量更無事
身心安樂復誰知

問支琴石

疑因星隕空中落歎被泥埋澗底沉天上定應勝地上

支機未必及支琴提攜拂拭知恩否雖不能言合有心
自喜

身慵難勉強性拙易遲迴布被辰時起柴門午後開忙
驅能者去閒逐鈍人來自喜誰能會無才勝有才

裴常侍以題薔薇架十八韻見示因廣為三十
韻以和之

託質依高架攢華對小堂晚開春去後獨秀院中央霽
景朱明早芳時白晝長穠因天與色麗共日爭光剪碧

排千萼研朱染萬房煙條塗石綠粉藥撲雌黃根動彤
雲涌枝搖赤羽翔九微燈炫轉七寶帳熒煌淑氣熏行

徑清陰接步廊照梁迷藻稅耀壁變雕牆爛若藂

徂紅切

然火殷於葉得霜臘脂含笑臉蘇合裛

於葉切

衣香浹洽

濡晨露玲瓏漏夕陽合羅排勘纈

胡結切

醉暈淺深粧乍

見疑迴面遙看誤斷腸風朝舞飛燕雨夜泣蕭娘桃李

慙無語芝蘭讓不芳石榴何細碎石竹苦尋常蕙慘偎

欄避蓮羞映浦藏怯教蕉葉戰妬得柳花狂豈可輕嘲

詠應須痛比方畫幀風自展繡織先諫切蓋誰張翠錦挑

成字丹砂印著行猩猩凝血點瑟瑟金匡散亂萎紅

片尖纖嫩紫芒觸僧飄毳褐留妓冒羅裳寡和陽春曲

多情騎省郎緣誇美顏色引出好文章東顧辭仁里語曰

里仁為美又裴君所居名仁和里西歸入帝鄉假如君愛殺留著莫移

將裴君題詩之次而常侍詔到唱和未竟而軒騎西歸故云

感舊詩卷

夜深吟罷一長吁老淚燈前濕白鬚二十年前舊詩卷

十人酬和九人無

酬李二十侍郎

筍老蘭長花漸稀
衰翁相對惜芳菲
殘鶯著雨慵休轉
落絮無風凝不飛
行掇木芽供野食
坐牽蘿蔓挂朝衣
十年分手今同醉
醉未如泥莫道歸

和夢得

夢得來詩云謾讀圖書四十車
年年為郡老天涯
一生不得文章力
百口空為

飽煖家

綸閣沉沉無寵命
蘇臺籍籍有能聲
豈唯不得清文力

但恐空傳冗吏名郎署迴翔何水部江湖留滯謝宣城
所嗟非獨君如此自古才難共命爭

贈草堂宗密上人

吾師道與佛相應念念無為法法能口藏宣傳十二部
心臺照耀百千燈盡離文字非中道長住虛空是小乘
少有人知菩薩行世間只是重高僧

喜照密閒實四上人見過

紫袍朝士白髯翁與俗乖疎與道通官秩三迴分洛下

交遊一半在僧中

農都切

世界終須出香火因緣久

願同齋後將何充供養西軒泉石北窓風

贈皇甫六張十五李二十三賓客

昨日三川新罷守今年四皓盡分司
幸陪散秩閒居日好是登山臨水時
家未苦貧常醞酒身雖衰病尚吟詩
龍門泉石香山月早晚同遊報一期

微之敦詩晦叔相次長逝歸然自傷因成二絕
併失鸛鸞侶空留麋鹿身只應嵩洛下長作獨遊人

長夜君先去殘年我幾何秋風滿衫淚泉下故人多

池上閒詠

青莎臺上起書樓綠藻潭中繫釣舟日晚愛行深竹裏
月明多上小橋頭
鬢嘗新酒還成醉亦出中門便當遊
一部清商聊送老
白鬚蕭颯管經秋

涼風歎

昨夜涼風又颯然
螢飄葉墜臥牀前
逢秋莫歎須知分
已過潘安三十年

和高僕射罷節度讓尚書授少保分司喜遂游

山水之作

覽辭八座罷雙旌便作登山臨水行能以忠貞酬重任
不將富貴礙高情朱門出去簪纓從絳帳歸來歌吹迎
鞍轡閑裝光滿馬何人信道是書生

送考功崔郎中赴闕

稱意新官又少年秋涼身健好朝天青雲上了無多路
却要徐驅穩著鞭

重修香山寺畢題二十二韻以紀之

闕塞龍門口祇園鷺

音就

嶺頭曾隨滅劫壞今遇勝緣修

再瑩新金剎重裝舊石樓病僧皆引起忙客亦淹留四
望窮沙界孤標出瞻州地圖鋪雒邑天柱倚松丘兩面
蒼蒼岼中心瑟瑟流波翻八灘雪堰護一潭油臺殿朝
彌麗房廊夜更幽千花高下塔一葉往來舟岫合雲初
吐林開霧半收靜聞樵子語遠聽棹郎謳官散殊無事
身閒甚自由吟來攜筆硯宿去抱衾裯霽月當窓白涼

風滿簾秋煙香封藥竈泉冷洗茶甌南祖心應學西方
社可投先宜知止足次要悟浮休覺路隨方樂迷塗到
老愁須除愛名障莫作戀家囚便合窮年住何言竟日
遊可憐終老地此是我菟_{土故切}裘

送楊八給事赴常州

無嗟別青瑣且喜擁朱輪五十得三品百千無一人須
勤念黎庶莫苦憶交親此外無過醉毗陵何限春

聞歌者唱微之詩

新詩絕筆聲名歇
舊卷生塵篋
筍深時向歌中聞
一句未容傾耳已傷心

醉送李二十常侍赴鎮浙東

靖安客舍花枝下
共脫青衫典濁醪
今日洛橋還醉別
金杯翻汗麒麟袍
喧闐夙駕君脂轄
酩酊離筵我藉糟
好去商山紫芝伴
珊瑚鞭動馬頭高

醉別程秀才

五度龍門點額迴
却緣多藝復多才
貧泥客路粘難出

愁瑣鄉心掣不開何必更遊京國去不如且入醉鄉來

吳絃楚調瀟湘弄為我殷勤送一杯

程生善琴尤能沉湘曲

自詠

白衣居士紫芝仙半醉行歌半坐禪今日維摩兼飲酒
當時綺季不請錢等閒池上留賓客隨事燈前有管絃
但問此身銷得否分司氣味不論年

把酒思閒事二首

把酒思閒事春愁誰最深乞錢羈客面落第舉人心月

下低眉立燈前抱膝吟憑君勸一醉勝與萬黃金
把酒思閒事春嬌何處多試鞍新白馬弄鏡小青娥掌
上初教舞花前欲按歌憑君勸一醉勸了問如何

衰荷

白露凋花花不殘涼風吹葉葉初乾無人解愛蕭條境

更遶衰藂

徂紅切

一匝看

池上送考功崔郎中兼別房賁二妓

文昌列宿徵還日洛浦行雲放散時鵝鷺上天花逐水

無因再會白家池

自問

依仁臺廢悲風晚履信池荒宿草春

晦叔亭臺在依仁微之池館在履信

自問老身騎馬出洛陽城裏覓何人

送陳許高僕射赴鎮

敦詩閱禮中軍帥重士輕財大丈夫常與師徒同苦樂
不教親故隔榮枯花鈿坐遶黃金印絲竹行隨白玉壺
商皓老狂唯愛醉時時能寄酒錢無

青氊帳二十韻

合聚千羊毳

蚩瑞切

施張百子卷

司馬遷書云張空卷

骨盤邊柳健

色染塞藍鮮北製因戎叛南移逐虜遷汰風吹不動禦

雨濕彌堅有頂中央聳無隅四嚮圓傍通門豁爾內密

氣溫然遠別關山外初安庭戶前影孤明月夜價重苦

寒年軟暖圍氊毯

土敢切

鎗撻束管絃最宜霜後地偏稱

雪中天側置低歌座平鋪小舞筵閒多揭簾入醉便擁

袍眠鐵檠

渠京切

移燈背銀囊帶火懸深藏曉蘭焰闇貯

宿香煙獸炭休親近孤裘可棄捐
硯溫融凍墨瓶煖燮春泉蕙帳徒招隱
茅庵浪坐禪貧僧應歎羨寒士定留連
賓客於中接兒孫向後傳王家誇舊物
未及此青氊

王子敬語偷兒云
青氊我家舊物

答夢得秋日書懷見寄

幸免非常病甘當本分衰
眼昏燈最覺腰瘦帶先知
樹葉霜紅日鬢鬚雪白時
悲愁緣欲老老過却無悲

同諸客題于家公主舊宅

平陽舊宅少人遊，應是遊人到即愁。
春穀鳥啼桃李院，絳絲蟲怨鳳皇樓。
臺傾滑石猶殘砌，簾斷珍珠不滿鉤。
聞道至今蕭史在，髭鬚雪白向明州。

答夢得八月十五夜翫月見寄

南國碧雲客，東京白首翁。
松江初有月，伊水正無風。
遠思兩鄉斷，清光千里同。
不知娃館上，何侶石樓中。

其夜余在

龍門石樓
上望月

初冬早起寄夢得

起戴烏紗帽行披白布裘
鑪溫先煖酒手冷未梳頭
早起煙霜白初寒鳥雀愁
詩成遣誰和還是寄蘇州

秋夜聽高調涼州

樓上金風聲漸緊月中銀字韻
初調促張絃柱吹高管

一曲涼州入沈

音血又寥
音決

香山寺二絕

空門寂靜老夫閒
伴鳥隨雲往復還
家醞滿瓶書滿架

半移生計入香山

愛風巖上攀松蓋戀月潭邊坐石稜且共雲泉結緣境
他生當作此山僧

送舒著作重授省郎赴闕

三歲相依在洛都遊花宴月飽歡娛惜別笙歌多怨咽
願留軒蓋少踟躕劍磨光彩依前出鵬舉風雲逐後驅
從此求閒應不得更能重醉白家無

同諸客嘲雪中馬上妓

珊瑚鞭韉

丁可切

馬踟躕引手低蛾索一盂腰為逆風成

弱柳面因衝冷作凝酥銀篦穩纂作紺切烏羅帽花簷宜

乘叱撥駒雪裏君看何所似王昭君妹寫真圖

喜劉蘇州恩賜金紫遙想賀宴以詩慶之

海內姑蘇太守賢恩加章綬豈徒然賀賓喜色欺杯酒
醉妓歡聲過管絃魚珮葦鱗光照地鶻銜瑞帶勢沖天
莫嫌鬢上些些白金紫由來稱長年

藍田劉明府攜酌相過與皇甫郎中卯時同飲

醉後贈之

臘月九日煖寒客卯時十分空腹杯玄晏舞狂烏帽落
藍田醉倒玉山顏貌偷花色老慙去歌躡柳枝春闌來
不為劉家賢聖物愁翁笑口大難開

劉蘇州以華亭一鶴遠寄以詩謝之

老鶴風姿異衰翁詩思深素毛如我鬢丹頂侶君心松
際雪相映雞羣塵不侵殷勤遠來意一隻重千金

早春憶蘇州寄夢得

吳苑四時風景好就中偏好是春天霞光曙後殷於火

水色晴來嫩侶煙士女笙歌宜月下使君金紫稱花前
誠知歡樂堪留戀其奈離鄉已四年

嘗新酒憶晦叔二首

樽裏看無色杯中動有光自君拋我去此物共誰嘗
世上強欺弱人間醉勝醒自君拋我去此語共誰聽

負春

病來道士教調氣老去山僧勸坐禪孤負春風楊柳曲
去年斷酒到今年

池上閒吟二首

高臥閒行自在身
池邊六見柳條新
幸逢堯舜無為日
得作羲皇向上人
四皓再除猶且健
三州罷守未全貧
莫愁客到無供給
家醞香濃野菜春

非莊非宅非蘭若
竹樹池亭十畝餘
非道非僧非俗吏
褐裘烏帽閉門居
夢遊信意寧殊蝶
心樂身閒便是魚
雖未定知生與死
其間勝負兩何如

早春招張賓客

久雨初晴天氣新
風煙草樹盡欣欣
雖當冷落衰殘日
還有陽和暖活身
池色溶溶藍染水
花光焰焰火燒春
商山老伴相收拾
不用隨他年少人

營間事

自笑營間事從朝到日斜
澆畦引泉脈掃逕避蘭芽
暖變牆衣色晴催木筆花
桃根知酒渴晚送一甌茶

感春

老思不禁春風光照眼
新花房紅鳥觜池浪碧
魚鱗倚

棹誰為伴持杯自問身心情多少在六十二三人

春池上戲贈李郎中

滿池春水何人愛唯我迴看指侶君直侶接奴同切藍新

汁色與君南宅染羅裙

翫半開花贈皇甫郎中

八年寒食日池東小樓上作

勿訝春來晚無嫌花發遲人憐全盛日我愛半開時紫

蠟粘為帶紅蘇點作粧

如佳切

成都新夾纈

胡結切

梁漢碎

臙脂樹杪真珠顆牆頭小女兒淺深粧駁落高下火參

差蝶戲爭香，孕鷺啼選穩枝。好教郎作伴，合共酒相隨。
醉翫無勝此，狂嘲更讓誰。猶殘少年興，未是老人詩。西
日憑輕照，東風莫殺吹。明朝應爛熳，後夜更離披。林下
遙相憶，樽前闌有期。銜杯嚼蕊思，唯我與君知。

池邊

柳老香絲宛，荷新鈿扇圓。殘春深樹裏，斜日小樓前。醉
遣收杯杓，閒聽理管絃。池邊更無事，看補採蓮船。

家釀新熟，每嘗輒醉。妻姪等勸，令少飲，因成長。

句以諭之

君應怪我朝朝飲不說向君君不知身上幸無疼痛處
甕頭正是撇當時劉妻勸諫夫休醉王姪分疎叔不癡
六十三翁頭雪白假如醒黥欲何為

送常秀才下第東歸

東歸多旅恨西上少知音寒食看花眼春風落日心百
憂當二月一醉直千金到處公卿席無辭酒盞深

且遊

手裏一杯滿心中百事休春應唯仰醉老更不禁愁弄
水迴船尾尋花信馬頭眼看筋力減遊得且須遊

題王家莊臨水柳亭

弱柳緣隄種虛亭壓水開條疑逐風去波欲上階來翠
羽偷魚入紅腰學舞迴春愁正無緒爭不盡殘杯

題令狐家木蘭花

膩如玉指塗朱粉光侶金刀剪紫霞從此時時春夢裏
應添一樹女郎花

拜表迴閒遊

玉珮金章紫花綬
紵衫藤帶白綸巾
晨興拜表稱朝士
晚出遊山作野人
達磨傳心令息念
玄元留語遣同塵
八關淨戒齋銷日
一曲狂歌醉送春
酒肆法堂方丈室
其間豈是兩般身

西街渠中種蓮疊石頗有幽致偶題小樓

朱檻低牆上清流
小閣前雇人栽菡
萏買石造潺湲影
落江心月聲移谷
口泉閒看卷簾坐
醉聽掩牕眠路笑

淘官水家愁費料錢是非君莫問一對一條然

晚春閒居楊工部寄詩楊常州寄茶同到因以

長句答之

宿醒寂寞眠初起春意闌珊日又斜勸我加餐因早笋
恨人休醉是殘花悶吟工部新來句渴飲毗陵遠到茶
兄弟東西官職冷門前車馬向誰家

玉泉寺南三里澗下多深紅躑躅繁艷殊常感

惜題詩以示遊者

玉泉南澗花奇怪不似花叢似火堆今日多情唯我到
每年無故為誰開寧辭辛苦行三里更有留連飲兩杯
猶有一般孤負事不將歌舞管絃來

早服雲母散

曉服雲英漱井華寥然身若在煙霞藥銷日晏三匙飯
酒渴春深一碗茶每夜坐禪觀水月有時行醉翫風花
淨名事理人難解身不出家心出家

三月晦日晚聞鳥聲

晚來林鳥語殷勤，侶惜風光說向人。
遣脫破袍勞報暖，催沽美酒敢辭貧。
聲聲勸醉應須醉，一歲唯殘半日春。

早夏遊平原迴

夏早日初長，南風草木香。
肩輿頗平穩，澗路甚清涼。
紫蕨行看採，青梅旋摘嘗。
療飢兼解渴，一盞冷雲漿。

宿天竺寺迴

野寺經三宿，都城復一還。
家仍念婚嫁，身尚繫朝班。
瀟灑秋臨水，沉吟晚下山。
長閒猶未得，逐日且偷閒。

侍中晉公欲到東洛先蒙書問期宿龍門思往

感今輒獻長句

昔蒙興化池頭送

太和三年春居易投賓客分司東今來特蒙侍中於興化里池上宴送今

許龍門潭上期聚散但慙長見念榮枯安敢道相思功
成名遂來雖久雲臥山遊去未遲聞說風情筋力在只
如初破蔡州時

奉和晉公侍中蒙除留守行及洛師感悅發中

斐然成詠

鸞鳳翱翔在寥廓
貂蟬瀟洒出埃塵
致成堯舜昇平代
收得夔龍強健身
拋擲功名還史冊
分張歡樂與交親
商山老皓雖休去
終是留侯門下人

送劉五司馬赴任硤州兼寄崔使君

位下才高多怨天
劉兄道勝獨恬然
貧於楊子兩三倍
老過榮公六七年
筆硯莫拋留壓案
筆瓢從陋也銷錢
郡丞自合當優禮
何況夷陵太守賢

菩提寺上方晚眺

樓閣高低樹淺深山光水色暝沉沉
嵩煙半卷青綃幕
伊浪平鋪綠綺衾
飛鳥滅時宜極目
遠風來處好開襟
誰知不離簪纓內
長得逍遙自在心

楊柳枝詞八首

六么水調家家唱
白雪梅花處處吹
古歌舊曲君休聽
聽取新翻楊柳枝

陶令門前四五樹
亞夫營裏百千條
何侶東都正二月
黃金枝映洛陽橋

依依嫋嫋復青青勾引春風無限情
白雪花繁空撲地
綠絲條弱不勝鶯

紅板江橋青酒旗館娃宮暖日斜時
可憐雨歇東風定
萬樹千條各自垂

蘇州楊柳任君誇更有錢塘勝館娃
若解多情尋小小
綠楊深處是蘇家

蘇家小女舊知名楊柳風前別有情
剝條盤作銀環樣
卷葉吹為玉笛聲

葉含濃露如啼眼
枝嫋輕風似舞腰
小樹不禁攀折苦
乞君留取兩三條

人言柳葉似愁眉
更有愁腸似柳絲
柳絲挽斷腸牽斷
彼此應無續得期

浪淘沙詞六首

一泊沙來一泊去
一重浪減一重生
相攪相淘無歇日
會教山海一時平

白浪茫茫與海連
平沙浩浩四無邊
暮去朝來淘不住

遂令東海變桑田

青草湖中萬里程
黃梅雨裏一人行
愁見灘頭夜泊處
風翻閣浪打船聲

借問江潮與海水
何似君情與妾心
相恨不如潮有信
相思始覺海非深

海底飛塵終日有
山頭化石豈無時
誰道小郎拋小婦
船頭一去沒迴期

隨波逐浪到天涯
遷客生還有幾家
却到帝鄉重富貴

請君莫忘浪淘沙

欽定四庫全書

白氏長慶集

五

白氏長慶集卷三十一

欽定四庫全書

白氏長慶集卷三十二

唐 白居易 撰

律詩

凡八十
二首

讀老子

言者不如知者默此語吾聞於老君若道老君是知者
緣何自著五千文

讀莊子

莊生齊物同歸一我道同中有不同
遂性逍遙雖一致
鸞凰終按勝蛇蟲

讀禪經

須知諸相皆非相若住無餘却有餘
言下忘言一時了
夢中說夢兩重虛空花豈得兼求果
物焰如何更覓魚
攝動是禪禪是動不禪不動即如如

感興二首

吉凶禍福有來由但要深知不要憂
只見火光燒潤屋

不聞風浪覆虛舟名為公器無多取利是身災合少求
雖異匏瓜難不食大都食足早宜休

魚能深入寧憂釣鳥解高飛豈觸羅熱處先爭炙手去
悔時其奈噬臍何樽前誘得猩猩血幕上偷安鷺鷥窠
我有一言君記取世間自取苦人多

問鶴

烏鷺爭食雀爭窠獨立池邊風雪多盡日蹋冰翹一足
不鳴不動意如何

代鶴答

鷹爪撚雞雞肋折鶻拳斃鴈鴈頭垂何如斂翅水邊立
飛上雲松棲穩枝

閒臥有所思二首

向夕褰簾臥枕琴微涼入戶起開襟偶因明月清風夜
忽想遷臣逐客心何處投荒初恐懼誰人遶澤正悲吟
始知洛下分司坐一日安閒直萬金

權門要路是身災散地閒居少禍胎今日憐君嶺南去

當時笑我洛中來
蟲全性命緣無毒
木盡天年為不才
大抵吉凶多自致
李斯一去二疏迴

喜閒

瀟洒伊嵩下
優游黃綺間
未曾一日悶
已得六年閒
魚鳥為徒侶
煙霞是往還
伴僧禪閉目
迎客笑開顏
興發宵遊寺
慵時晝掩關
夜來風月好
悔不宿香山

詩酒琴人例多薄
命予酷好三事雅
當此科而所得已多為幸
斯甚偶成狂詠聊寫愧懷

愛琴愛酒愛詩客多賤多窮多苦辛中散步兵終不貴
孟郊張籍過於貧一之已歎闕於命三者何堪併在身
只合飄零隨草木誰教凌厲出風塵榮名厚祿二千石
樂飲閒遊三十春何得無厭時咄咄猶言薄命不如人

寄明州于駙馬使君三絕句

有花有酒有笙歌其奈難逢親故何近海饒風春足雨
白鬚太守悶時多

平陽音樂隨都尉留滯三年在浙東吳越聲邪無法用

莫教偷入管絃中

何郎小妓歌喉好嚴老呼為一串珠

嚴尚書與于駙馬詩云莫損歌喉一

串珠海味腥鹹損聲氣聽看猶得斷腸無

閒臥

薄食當齋戒散班同隱淪佛容為弟子天許作閒人唯
置牀臨水都無物近身清風散髮臥兼不要紗巾

春早秋初因時即事兼寄浙東李侍郎

春早秋初晝夜長可憐天氣好年光和風細動簾帷暖

清露微凝枕簟涼
窓下曉眠初減被
池邊晚坐乍移牀
閒從蕙草侵堦綠
靜任槐花滿地黃
理曲管絃閑後院
熨衣燈火映深房
四時新景何人別
遙憶多情李侍郎

新秋喜涼

過得炎蒸月九宜
老病身衣裳朝不潤
枕簟夜相親
樓月纖纖早波風
嫋嫋新光陰
與時節先感是詩人

初夏閒吟
魚呈韋賓客

孟夏清和月
東都閒散官
體中無病痛
眼下未飢寒
世

事聞常悶交游見即歡
杯觴留客切妓樂取人寬
雪鬢隨身老雲心著處安
此中殊有味試說向君看

哭崔二十四常侍

崔好酒放歌忘懷生死
知疾不起自為誌文

貂冠初別九重門
馬鬣新封四尺墳
薤露歌詞非白雪
旌銘官爵是浮雲
伯倫每置隨身鋪
元亮先為自祭文
莫道高風無繼者
一千年內有崔君

奉酬侍中夏中雨後遊城南莊見示八韻

島樹間林巒雲收雨氣殘
四山嵐色重五月水聲寒
老

鶴兩三隻新篁千萬竿化成天竺寺移得子陵灘心覺
閒彌貴身緣健更歡帝將風后待人作謝公看角里年
雖老高陽興未闌佳辰不見召爭免趣杯盤

來詩云何處趣杯盤

送兗州崔大夫駙馬赴鎮

戚里誇為賢駙馬儒家認作好詩人魯侯不得辜風景
沂水年年有暮春

少年問

少年怪我問如何何事朝朝醉復歌號作樂天應不錯

憂愁時少樂時多

問少年

千首詩堆青玉案十分酒寫白金盃
迴頭却問諸年少
作箇狂夫得了無

代琵琶弟子謝女師曹供奉寄新調弄譜

琵琶師在九重城忽得書來喜且驚
一紙展看非舊譜
四絃翻出是新聲
琵琶掩抑嬌多怨
散水玲瓏峭更清
珠顆淚霑金捍撥
紅粧弟子不勝情

琵琶掩抑嬌多怨散水玲瓏峭更清
皆新調名

代林園戲贈

裴侍中新修集賢宅成池館甚盛數往遊宴醉歸自戲耳

南院今秋遊宴少西坊近日往來頻
假如宰相池亭好作客何如作主人

戲答林園

豈獨西坊來往頻偷閒處處作遊人
衡門雖是棲遲地不可終朝鏤老身

重戲贈

集賢池館從他盛履道林亭勿自輕
往往歸來嫌窄小

年年為主莫無情

重戲答

小水低亭自可親
大池高館不關身
林園莫妬裴家好
憎故憐新豈是人

早秋登天宮寺閣贈諸客

天宮閣上醉蕭辰
絲管閒聽酒慢巡
為向涼風清景道
今朝屬我兩三人

曉上天津橋
閒望偶逢盧郎中
張員外攜酒同

傾

上陽宮裏曉鍾後天津橋頭殘月前空濶境疑非下界
飄飄身似在寥天星河隱映初生日樓閣蔥蘢半出煙
此處相逢傾一盞始知地上有神仙

八月十五夜同諸客翫月

月好共傳唯此夜境閒皆道是東都嵩山表裏千重雪
洛水高低兩顆珠清景難逢宜愛惜白頭相勸強歡娛
誠知亦有來年會保得晴明強健無

對晚開夜合花贈皇甫郎中

移晚按一月花遲過半年紅
開杪秋日翠合欲昏天白
露滴未死涼風吹更鮮
後時誰肯顧唯我與君憐

醉遊平泉

狂歌箕踞酒樽前
眼不看人面向天
洛客最閒唯有我
一年四度到平泉

題贈平泉韋徵君拾遺

箕穎千年後
唯君得古風
位留丹陛上
身入白雲中
躁

靜心相背高低跡不同
籠雞與梁燕不信有冥鴻

酬皇甫郎中對新菊花見憶

愛菊高人吟逸韻
悲秋病客感衰懷
黃花助興方攜酒
紅葉添愁正滿階
居士葷腥今已斷
仙郎杯杓為誰排
愧君相憶東籬下
擬廢重陽一日齋

夜宴醉後留獻裴侍中

九燭臺前十二姝
主人留醉甚歡娛
翩翻舞袖雙飛蝶
宛轉歌聲一索珠
坐久欲醒還酩酊
夜深初散又踟蹰

南山賓客東山妓此會人間曾有無

和韋庶子遠坊赴宴未夜先歸之作兼呈裴員

外

員外亦愛
先逃歸

促席留歡日未曛遠坊歸思已紛紛無妨按轡行乘月
何必逃杯走似雲銀燭忽拋楊柳曲金鞍潛送石榴裙
到時常晚歸時早笑樂三分校一分

集賢池答侍中問

主人晚入皇城宿問客徘徊何所須池月幸閒無用處

今宵能借客遊無

楊柳枝二十韻

楊柳枝洛下新聲也洛之小妓有善歌之者詞章音韻聽可動

人故賦之

小妓攜桃葉新歌蹋柳枝粧成剪燭後醉起拂衫時繡履嬌行緩花筵笑上遲身輕委迴雪羅薄透凝脂笙引簧頻煖箏催柱數移樂童翻怨調才子與妍詞便想人如樹先將髮比絲風條搖兩帶煙葉貼雙眉口動櫻桃破鬟低翡翠垂枝柔腰媚娜萼嫩手葳蕤唳鶴晴呼侶

哀猿夜叫兒玉敲音歷歷珠貫字纍纍袖為收聲點釵
因赴節遺重重遍頭別一一拍心知塞北愁攀折江南
苦別離黃遮金谷岸綠映杏園池春惜芳華好秋憐顏
色衰取來歌裏唱勝向笛中吹曲罷那能別情多不自
持纏頭無別物一首斷腸詩

答皇甫十郎中秋深酒熟見憶

煙景冷蒼茫秋深夜夜霜為思池上酌先覺甕頭香未
暇傾巾漉還應染指嘗醅醕慙氣味琥珀讓晶光若許

陪歌席須容散道場月終齋戒畢猶及菊花黃

老去

老去愧妻兒冬來有勸詞
煖寒從飲酒衝冷少吟詩
戰勝心還壯齋勤體校羸
由來世間法損益合相隨

送宗實上人遊江南

忽辭洛下緣何事擬向江南住
幾時每過渡頭傷問法
無妨菩薩是船師

和同州楊侍郎誇柘枝見寄

細吟馮翊使君詩憶作餘杭太守時君有一般輸我事
柘枝看校十年遲

冬初酒熟二首

霜繁脆庭柳風利剪池荷月色曉彌苦鳥聲寒更多秋
懷久寥落冬計又如何一甕新醅酒萍浮春水波

酒熟無來客因成獨酌謠人間老黃綺地上散松喬忽
忽醒還醉悠悠暮復朝殘年多少在盡付此中銷

送姚杭州赴任因思舊游二首

與君細話杭州事為我留心莫等閒
閭里固宜勤撫恤樓臺亦要數躋攀
笙歌縹緲虛空裏風月依稀夢想間
且喜詩人重管領遙飛一盞賀江山

渺渺錢塘路幾千想君到後事依然
靜逢竺寺猿偷橘閒看蘇家女採蓮
故妓數人憑問訊新詩兩首倩留傳
舍人雖健無多興老校當時八九年

寄李相公

漸老只謀歡雖貧不要官
唯求造化力試為駐春看

冬日平泉路晚歸

山路難行日易斜
煙村霜樹欲棲鴉
夜歸不到應閒事
熱飲三杯即是家

利仁北街作

草色班班春雨晴
利仁坊北面西行
踟躕立馬緣何事
認得張家歌吹聲

洛陽堰閒行

洛陽堰上新晴日
長夏門前欲暮春
遇酒即沽逢樹歇

七年此地作閒人

過永寧

村杏野桃繁似雪
行人不醉為誰開
賴逢山縣盧明府
引我花前勸一杯

往年稠桑曾喪白馬
題詩廳壁今來尚存
又復感懷更題絕句

路傍埋骨蒿草合
壁上題詩塵蘚生
馬死七年猶悵望
自知無乃太多情

羅敷水

野店東頭花落處一條流水號羅敷
芳魂艷骨知何在
春草茫茫墓亦無

路逢青州王大夫赴鎮立馬贈別

大旆擁金羈書生得者稀
何勞問官職
豈不見光輝
赫赫人爭看
翩翩馬欲飛
不期前歲尹
駐節語依依

前年春予

為河南尹
王為少尹

和楊同州寒食乾坑會後聞楊工部欲到知予

與工部有宿酲

夜飲歸常晚朝眠起更遲舉頭中酒後引手索茶時拂
枕青長袖欹簪白接羅宿酲無興味先是肺神知

和劉汝州酬侍中見寄長句因書集賢坊勝事
戲而問之

洛川汝海封畿接履道集賢來往頻一復時程雖不遠

百餘步地更相親

汝去洛程一宿履道集賢
兩宅相去一百三十步

朱門陪宴

多投轄青眼留歡任吐茵聞道郡齋還有酒風前月下

對何人

池上二絕

山僧對碁坐局上竹陰清映竹無人見時聞下子聲
小娃撐小艇偷採白蓮迴不解藏踪跡浮萍一道開

白羽扇

素是自然色圓因裁製功颯如松起籟飄似鶴翻空盛
夏不銷雪終年無盡風引秋生手裏藏月入懷中麈尾
斑非足蒲葵陋不同何人稱相對清瘦白鬚翁

五月齋戒罷宴徹樂聞韋賓客皇甫郎中飲會
亦稀又知欲攜酒饌出齋先以長句呈謝

妓房匣鏡滿紅埃酒庫封瓶生綠苔居士爾時緣護戒
車公何事亦停杯散齋香火今朝散開素盤筵後日開
隨意往還君莫怪坐禪僧去飲徒來

閒園獨賞

因夢得所寄蜂鶴之
詠因成此篇以和之

午後郊園靜晴來景物新雨添山氣色風借水精神永
日若為度獨遊何所親仙禽狎君子芳樹倚佳人蟻鬪

王爭肉蝸移舍逐身蝶雙知伉儷蜂分見君臣蠢蠕形
雖小道遙性即均不知鵬與鷃相去幾微塵

種柳三詠

白頭種松桂早晚見成林不及栽楊柳明年便有陰春
風為催促副取老人心

從君種楊柳夾水意如何準擬三年後青絲拂綠波仍
教小樓上對唱柳枝歌

更想五年後千千條翹塵路傍深映月樓上閣藏春愁

殺閒遊客聞歌不見人

偶吟

好官病免曾三度散地歸休已七年老自退閒非世棄
貧蒙強健是天憐韋荆南去留春服王侍中來乞酒錢
便得一年生計足與君美食復甘眠

池上即事

移牀避日依松竹解帶當風挂薜蘿鈿砌池心綠蘋合
粉開花面白蓮多久陰新霽宜絲管苦熱初涼入綺羅

家醞瓶空人客絕今宵爭奈月明何

南塘暝興

水色昏猶白霞光闇漸無風荷搖破扇波月動連珠蟋蟀啼相應鴛鴦宿不孤小僮頻報夜歸步尚踟躕

小宅

小宅里間接疎籬雞犬通渠分南巷水窓借北家風庾信園殊小陶潛屋不豐何勞問寬窄寬窄在心中

諭親友

適情處處皆安樂大抵園林勝市朝煩鬧榮華猶易過
優閒福祿更難銷自憐老大宜疎散却被交親歎寂寥
終日相逢不相見兩心相去一何遙

龍門送別皇甫澤州赴任韋山人南遊

隼旗歸洛知何日鶴駕還嵩莫過春惆悵香山雲水冷
明朝便是獨遊人

劉蘇州寄釀酒糯米李浙東寄楊柳枝舞衫偶

因嘗酒試衫輒成長句寄謝之

柳枝謾蹋試雙袖桑落初香嘗一杯金屑醅濃吳米釀
銀泥衫穩越娃裁舞時已覺愁眉展醉後仍教笑口開
慙愧故人憐寂寞三千里外寄歡來

詔授同州刺史病不赴任因詠所懷

同州慵不去此意復誰知誠愛俸錢厚其如身力衰可
憐病判案何似醉吟詩勞逸懸相遠行藏決不疑徒煩
人勸諫只合自尋思白髮來無限青山去有期野心惟
怕閑家口莫愁飢賣却新昌宅聊充送老資

寄楊六侍郎

時楊初投戶部
予不赴同州

西戶最榮君好去左馮雖穩我慵來
秋風一筋鱸魚膾
張翰搖頭喚不迴

韋七自太子賓客再除秘書監以長句賀而餞

之

韋往年嘗與
予同為秘書監

離筵莫愴且同歡共賀新恩拜舊官
屈就商山伴麋鹿
好歸芸閣狎鸛鸞落星石上蒼苔古
畫鶴廳前白露寒
老監姓名題在壁相思試為拂塵看

酒熟憶皇甫十

新酒此時熟故人何日來自從金谷別不見玉山頽疎
索柳花盈寂寥荷葉杯今冬問氈帳雪裏為誰開

九年十一月二十一日感事而作

其日獨遊香山寺

禍福茫茫不可期大都早退自先知當君白首同歸日
是我青山獨往時顧索素琴應不暇憶牽黃犬定難追
麒麟作脯龍為醢何似泥中曳尾龜

即事重題

重裘暖帽寬羶履小閣低窓深地鑪身穩心安眠未起
西京朝士得知無

將歸渭村先寄舍弟

一年年覺此身衰一日日知前事非詠月嘲風先要減
登山臨水亦宜稀子平嫁娶貧中畢元亮田園醉裏歸
為報阿連寒食下與吾釀酒掃柴扉

看嵩洛有歎

今日看嵩洛迴頭歎世間榮華急如水憂患大於山見

苦方知樂經忙始愛閒未聞籠裏鳥飛出肯飛還

詠懷

隨緣逐處便安閒不入朝廷不住山心似虛舟浮水上
身同宿鳥寄林間尚平婚嫁了無累馮翊符章封却還

時阿羅初嫁及同州官吏放歸

處分貧家殘活計正如身後莫相關

詠老贈夢得

與君俱老也自問老何如眼澀夜先臥頭慵朝未梳有
時扶杖出盡日閉門居懶照新磨鏡休看小字書情於

故人重跡共少年疎唯是閒談興相逢尚有餘



白氏長慶集卷三十二

欽定四庫全書

集部

白氏長慶集卷三十三

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官庶吉士_臣吳裕德

謄錄監生_臣沈希曾

欽定四庫全書

白氏長慶集卷三十三

唐白居易撰

律詩

凡一百首

從同州刺史改授太子少傅分司

承華東署三分務履道西池七過春
歌酒優游聊卒歲
園林蕭灑可終身
留侯爵秩誠虛貴
疏受生涯未苦貧
月俸百千官二品
朝廷催我作閒人

張良疎受並
為太子少傅

奉和裴令公新成午橋庄綠野堂即事

舊徑開桃李新池鑿鳳凰只添丞相閣不改午橋庄
遠處塵埃少閒中日月長青山為外屏綠野是前堂
引水多隨勢栽松不趁行年華玩風景春事看農桑
花妬謝家妓蘭偷荀令香遊絲飄酒席瀑布濺琴床
巢許終身穩蕭曹到老忙千年落公便進退處中央

時裴加
中書令

自題小草亭

新結一茅茨規模儉且卑土階全壘塊山木半留皮
陰

合連藤架藜香近菊籬壁宜藜杖倚門稱荻簾垂窻裏
風清夜簷間月好時留連常酒客勾引坐禪師伴宿雙
棲鶴扶行一侍兒綠醅量盞飲紅稻約升炊醒齷豪家
笑酸寒富室欺陶廬間自愛顏巷陋誰知螻蟻謀深穴
鷓鴣占小枝各隨其分足焉用有餘為

自詠

細故隨緣盡形衰具體微關間僧尚閑較瘦鶴猶肥老
遣寬裁襪寒教厚絮衣馬從銜草輾雞任啄籠飛只要

卷三十三
天和在無令物性違自餘君莫問何是復何非

新亭病後獨坐招李侍郎公垂

新亭未有客竟日獨何為
起暖泥茶竈防寒夾竹籬
頭風初定後眼闇欲明時
淺把三分酒閒題數句詩
應須置兩榻一榻待公垂

閒臥寄劉同州

軟褥短屏風昏昏醉臥翁
鼻香茶熟後腰暖日陽中
伴老琴長在迎春酒不空
可憐閒氣味唯欠與君同

殘酌晚飡

閒傾殘酒後煖擁小鑪時舞看新翻曲歌聽自作詞魚
香肥潑火飯細滑流匙除却慵饒外其餘盡不知

喜見劉同州夢得

紫綬白髭鬚同年二老夫論心共牢落見面且歡娛酒
好攜來否詩多記得無應須為春艸五馬少踟躕

裴令公席上贈別夢得

年老官高多別離轉難相見轉相思雪銷酒盡梁王起

便是鄒枚分散時

尋春題諸家園林

聞健朝朝出乘春處處尋
天供閒日月人借好園林
漸以狂為態都無悶到心
平生身得所未省似而今

又題一絕

貌隨年老欲何如
興遇春牽尚有餘
遙見人家花便入
不論貴賤與親疎

家園三絕

滄浪峽水子陵灘路遠江深欲去難何似家池通小院
臥房階下插魚竿

籬下先生時得醉甕間吏部暫偷閒何如家醞雙魚榼
雪夜花時長在前

鴛鴦怕捉竟難親鸚鵡雖籠不著人何似家禽雙白鶴
閒行一步亦隨身

老來生計

老來生計君看取白日遊行夜醉吟陶令有田唯種黍

鄧家無子不留金人間榮耀因緣淺林下幽閒氣味深
煩慮漸銷虛白長一年心勝一年心

早春題少室東巖

三十六峰晴雪銷嵐氣生月留三夜宿春引四山行遠
草初含色寒禽未變聲東巖最高石唯我有題名

早春即事

眼重朝眠足頭輕宿酒醒陽光滿前戶雪水半中庭物
變隨天氣春生逐地形北簷梅晚白東岸柳先青葱壠

抽羊角松巢墮鶴翎老來詩更拙吟罷少人聽

歎春風兼贈李二十侍郎二絕

樹根雪盡催花發池岸冰消放草生唯有鬚霜依舊白
春風於我獨無情

道場齋戒今初畢酒伴歡娛久不同不把一杯來勸我
無情亦得似春風

春來頻與李二賓客郭外同遊因贈長句

風光引步酒開顏送老消春嵩洛間朝蹋落花相伴出

暮隨飛鳥一時還我為病叟誠宜退君是才臣豈合閒
可惜濟時心力在放教臨水復登山

二月二日

二月二日新雨晴草芽菜甲一時生輕衫細馬春年少
十字津頭一字行

春和令公綠野堂種花

綠野堂開占物華路人指道令公家令公桃李滿天下
何用堂前更種花

清明日登老君閣望洛城贈韓道士

風光煙火清明日歌哭悲歡城市間
何事不隨東洛水誰家又葬北邙山
橋車馬長無已下渡舟航亦不閒
冢墓纍纍人擾擾遼東悵望鶴飛還

三月三日

畫堂三月初三日絮撲紗窻燕拂簷
蓮子數杯嘗冷酒柘枝一曲試春衫
階臨池面勝看鏡戶映花叢當下簾
指點樓南玩新月玉鉤素手兩纖纖

雨中聽琴者彈鶴操

雙鶴分離一何苦連陰雨夜不堪聞
莫教遷客孀妻聽
嗟嘆悲啼詎殺君

酬鄭二司錄與李六郎中寒食日相過同宴見

贈

二人並
是同年

偶因冷節會嘉賓況是平生心所親
迎接須矜疎傳老
祇供莫笑阮家貧
杯盤狼籍宜親夜
風景闌珊欲過春
相對喜歡還悵望
同年只有此三人

喜楊六侍御同宿

岸幘靜言明月夜匡牀閒臥落花朝二三月裏饒春睡
七八年來不早朝濁水清塵難會合高鵬低鷄各逍遙
眼看又上青雲去更卜同衾一兩宵

殘春詠懷贈楊暮巢侍郎

位逾三品日

太子少傅
官三品

年過六旬時

予今年
六十五

不道官班

下其如筋力衰猶憐好風景轉重舊親知少壯難重得
歡娛且強為興來池上酌醉出袖中詩靜話開襟久閒

吟放盞遲落花無限雪殘鬢幾多絲莫說傷心事春翁
易酒悲

閒居春靜

閒泊池州靜掩扉老身慵出客來稀愁應暮雨留教住
春被殘鶯喚遣歸揭甕偷嘗新熟酒開箱試著舊生衣
冬裘夏葛相催促垂老光陰速似飛

春盡日天津橋醉吟偶呈李尹侍郎

宿雨洗天津無泥未有塵初晴迎早夏落照送殘春興

發詩隨口狂來酒寄身水邊行
嵬峩橋上立逡巡疎傳
心情老吳公政化新三川徒有主風景屬閒人

池上逐涼二首

青苔地上消殘暑綠樹陰前逐晚涼
輕屐單衫薄紗帽

淺池平岸痺

毗切意

藤床簪纓怪我情何薄
泉石諳君味

甚長徧問交親為老計多言宜靜不宜忙

窻間睡足休高枕水伴行來上小船
棹遣禿頭奴子撥
茶教纖手侍兒煎
門前便是紅塵地
林外無非赤日天

誰信好風清簟上更無一事但翛然

香山避暑二絕

六月灘聲如猛雨香山樓北暢師房夜深起凭闌干立
滿耳潺湲滿面涼

紗巾草履竹疎衣晚下香山蹋翠微一路涼風十八里
臥乘籃輦睡中歸

老夫

七八年來遊洛都三分遊伴二分無風前月下花園裏

處處唯殘个老夫世事勞心非富貴人生實事是歡娛
誰能逐我來閒坐時共酣歌傾一壺

香山卜居

老須為老計老計在抽簪山下初投足人間久息心亂
藤遮石壁絕澗護雲林若要深藏處無如此處深

無長物

莫訝家居窄無嫌活計貧只緣無長物始得作閒人青
竹單床簾烏紗獨幅巾其餘皆稱是亦足奉吾身

宿香山寺酬廣陵牛相公見寄

來詩云唯羨東都白居易月明

香積問禪師時牛相
三表乞退有詔不許

手札八行詩一篇無由相見但依然君匡聖主方行道

我是空王正坐禪支許徒思遊白月夔龍未放下青天

應須且為蒼生住猶去懸車十四年

牛相公今年五十七

以詩代書寄戶部楊侍郎勸買東鄰王家宅

勸君買取東鄰宅與我衡門相並開雲映高峰當戶牖
月和伊水入池臺林園亦要趣閒置筋力應須及健迴

莫學因循白賓客欲年六十始歸來

贈談客

上客清談何疊疊幽人閒思自寥寥請君休說長安事
膝上風清琴正調

初入香山院對月

太和六年秋作

老住香山初到夜秋逢白月正圓時從今便是家山月
試問清光知不知

題龍門堰西澗

東岸菊藂西岸柳柳陰煙合菊花開一條秋水琉璃色
澗狹纔容小舫迴除却悠悠白少傳何人解入此中來
秋霖中奉裴令公見招早出赴會馬上先寄六

韻

雨闇三秋日泥深一尺時老人平旦出自欲問何之不
是尋醫藥非干送別離素書傳好語絳帳赴佳期續借
桃花馬催迎楊柳姬只愁張錄事罰我怪來遲

嘗酒聽歌招客

一甕香醪新插芻雙鬟小妓薄能謳管絃漸好新教得
羅綺雖貧免外求世上貪忙不覺苦人間除醉即須愁
不知此事君知否君若知時從我遊

八月三日作

露白月微明天涼景物清
草頭珠顆冷樓角玉鉤生氣
爽衣裳健風疎砧杵鳴
夜衾香有思秋簟冷無情
夢短眠頻覺宵長起暫行
燭凝臨曉影蟲怨欲寒聲
槿老花先盡蓮凋子始成
四時無了日何用嘆衰榮

病中贈南隣覓酒

頭痛牙疼三日臥妻看煎藥婢來扶今朝自按擡頭語
先問南隣有酒無

曉眠後寄楊戶部

軟綾腰褥薄綿被涼冷秋天穩暖身一覺曉眠殊有味
無因寄與早朝人

秋雨夜眠

涼冷三秋夜安閒一老翁臥遲燈滅後睡美雨聲中灰

宿溫瓶火香添暖被籠曉晴寒未起霜葉滿階紅

喜夢得自馮翊歸洛兼呈令公

上客新從左輔迴高陽興助洛陽才已將四海聲名去
又占三春風景來甲子等頭憐共老文章敵手莫相猜
鄒枚未用爭詩酒且飲梁王賀喜杯

齋戒滿夜戲招夢得

紗籠燈下道場前白日持齋夜坐禪無復更思身外事
未能全盡世間緣明朝又擬親杯酒今夕先聞理管絃

方丈若能來問疾不妨兼有散花天

和令公問劉賓客歸來稱意無之作

水南秋一半風景未蕭條
阜蓋迴沙苑藍輦上洛橋
閒嘗黃菊酒醉唱紫芝謠
稱意那勞問請錢不早朝

酬夢得窮秋夜坐即事見寄

焰細燈將盡聲遙漏正長
老人秋向火小女夜縫裳
菊悴籬經雨萍銷水得霜
今冬暖寒酒先擬共君嘗

偶于維揚牛相公處覓得箏箏未到先寄詩來

走筆戲答

來詩云但愁封寄
去魔物或驚禪

楚匠饒巧思秦箏多好音如能會一面何啻直雙金玉
柱調須品朱絃染要深會教魔女弄不動是禪心

答夢得秋庭獨坐見贈

林梢隱映夕陽殘庭際蕭疎夜氣寒霜艸欲枯蟲思急
風枝未定鳥棲難容衰見鏡同惆悵身健逢杯且喜歡
應是天教相煖熱一時垂老與閒官

長齋月滿攜酒先與夢得對酌醉中同赴令公

之宴戲贈夢得

齋宮前日滿三旬酒榼今朝一拂塵乘興還同訪戴客
解醒仍對姓劉人病心湯沃寒灰活老面花生朽木春
若怕平原怪先醉知君未慣吐車茵

奉酬淮南牛相公思黯見寄二十四韻

每對雙
關分叙

兩
意

白老忘機客牛公濟世賢鷗棲心戀水鵬舉翅摩天累
就優賢秩連操造化權貧司甚瀟灑榮路自喧闐望苑

三千日台階十五年是人皆棄忘何物不陶甄

居易三任官寮

皆分司東都于茲八載思黜出藍輦遊嵩嶺油幢鎮海

八外內凡十五年皆同平章事塼竹篙撐釣艇金甲擁樓船雪夜尋僧舍春朝列妓筵

長齋儼香火密宴簇花鈿自覺閒勝閑遙知醉笑禪是

非分未定會合杳無緣我正思楊府君應望洛川西來

風嫋嫋南去雁連連日落龍門外潮生瓜步前秋同一

時盡月共兩鄉圓舊眷交歡在新文氣調全慙無白雪

曲難答碧雲篇金谷詩誰賞蕪城賦衆傳珠應晒魚目

鈎未伏龍泉遠許驚魔物深情寄酒錢霜紉一百疋玉

柱十三絃

思黯遠寄箏來先寄詩云但愁封寄去魔物或驚禪仍與酒資同至

楚醞來樽

裏秦箏送耳邊何時紅燭下相對一陶然

吳祕監每有美酒獨酌獨醉但蒙詩報不以飲

招輒此戲酬兼呈夢得

蓬山仙客下煙霄對酒唯吟獨酌謠不怕道狂揮玉爵

記云飲玉爵者弗揮

亦曾乘興換金貂

吳監前任散騎常侍

君稱名士誇能

飲

王孝伯云但常無事讀離騷痛飲只可稱名士

我是愚夫可見招

獨酌謠云愚夫子不

招賴有伯倫為醉伴何愁不解傲松喬

酬夢得霜夜對月見懷

淒清冬夜景搖落長年情月帶親霜色碁和遠雁聲暖
憐鑪火近寒覺被衣輕枕上酬佳句詩成夢不成

初冬月夜得皇甫澤州手札并詩數篇因遣報

書偶題長句

清冷玉韻兩三章落箔銀鉤七八行心逐報書懸鴈足
夢尋來路遶羊腸水南空地多明月山北天寒足早霜

履道所居在水南澤
州在太行之北地也
最恨潑醅新熟酒迎君不得共君

嘗

雪中酒熟欲攜訪吳監先寄此詩

新雪對新酒憶同傾一杯自然須訪戴不必待延枚

雪賦

云延枚陳榻無辭解袁門莫懶開笙歌與談笑隨事自將

來

酬令公雪中見贈訝不與夢得同相訪

雪似鵝毛飛散亂人披鶴氅立徘徊鄒生枚叟非無興

唯待梁王召即來

題酒甕呈夢得

若無清酒兩三甕爭向白鬚千萬莖
麴蘖消愁真得力
光陰催老苦無情
凌烟閣上功無分
伏火鑪中藥未成
更擬共君何處去
且來同作醉先生

迂叟

一辭魏闕就商賓
散地閒居八九春
初時被目為迂叟
近日蒙呼作隱人
冷煖俗情諳世路
是非閒論任交親

應須繩墨機關外安置疎愚鈍滯身

洛下閒居寄山南令狐相公

已收身向園林下猶寄名於祿仕間
不鍛嵇康彌懶靜無金疏傅更貧閒
支分門內餘生計謝絕朝中舊往還
唯是相君忘未得時思漢水夢巴山

惜春贈李尹

春色有時盡公門終日忙
兩衙但不闕一醉亦何妨
芳樹花團雪衰翁鬢撲霜
知君倚年少未苦惜風光

對酒勸令公開春遊宴

時泰歲豐無事日功成名遂自由身
前頭更有忘憂日
向上應無快活人
自去年來多事故
從今日去少交親
宜須數數謀歡會
好作開成第二春

與夢得偶同到敦詩宅感而題壁

山東纔副蒼生願

漢書云山東出相

川上俄驚逝水波
履道淒淒

涼新宅第

敦詩宅在履道修造初成

宣城零落舊笙歌

崔家妓樂多歸宣州也

園荒唯有薪堪採
門冷魚無雀可羅
今日相逢偶同到

傷心不是故經過

楊六尚書新授東川節度使代妻戲賀兄嫂二

絕

劉綱與婦共昇仙弄玉隨夫亦上天何似沙哥領崔嫂
碧油幢引向東川

金花銀碗饒君用

過合切

畫羅衣儘嫂裁覓得黔妻為

妹壻可能空寄蜀茶來

閒遊即事

郊野遊行熟村園次第過
驀山尋浥澗蹋水渡伊河
寒食青青草春風瑟瑟波
逢人共杯酒隨馬有笙歌
勝事經非少芳辰過亦多
還須自知分不老擬如何

六十六

七十欠四歲此生那足論
每因悲物故還且喜身存
安得頭長黑爭教眼不昏
交遊成拱木婢僕見曾孫
瘦覺腰金重衰憐鬢雪繁
將何理老病應付與空門

池上早春即事招夢得

老更驚年改閒先覺日長晴熏榆莢黑春染柳梢黃雲
破山呈色冰融水放光低平穩船舫輕暖好衣裳白角
三升榼紅茵六尺牀偶遊難得伴獨醉不成狂我有中
心樂君無外事忙經過莫慵懶相去兩三坊

因夢得題公垂所寄蠟燭因寄公垂

照梁初日光相似出水新蓮艷不如却寄兩條君令取

明年雙引入中書

宰相入朝舉雙
燭餘官各一

令公南庄花柳正盛欲偷一賞先寄二篇

最憶樓花千萬朵，偏憐隄柳兩三株。擬提社酒攜村妓，

擅入朱門莫怪無。

映樓苑花拂隄垂柳庄上最勝絕處故舉以為對

可惜亭臺閒度日，欲偷風景暫遊春。只愁花裏鶯饒舌，飛入宮城報主人。

春夜宴席上戲贈裴淄州

九十不衰真地仙。

謂淄州也

六旬猶健亦天憐。

予自謂也

今年相

遇鶯花月，此夜同歡歌。酒筵四座齊聲和，絲竹兩家隨分闌。金鈿留君到曉無，他意圖向君前作少年。

贈夢得

年顏老少與君同，眼未全昏耳未聾。
放醉臥為春日伴，趨歡行入少年叢。
尋花借馬煩川守，弄水偷船惱令公。
聞道洛城人盡怪，呼為劉白二狂翁。

晚春欲攜酒尋沈四著作先以六韻寄之

病容衰慘澹芳景，晚蹉跎無計留春得。
爭能奈老何？篇

章慵報答，杯讌喜經過。
顧我酒狂久，負君詩債多。

沈前後惠

詩十餘首，春來多醉。
竟未酬答，今故云爾。
敢辭攜綠蟻，只願見青娥。
最憶陽

關唱真珠一串歌

沈有誣者善唱西
出陽關無故人詞

開成二年三月三日河南尹李待價以人和歲
稔將楔於洛濱前一日啓留守裴令公令公
明日召太子少傅白居易太子賓客蕭籍李
仍叔劉禹錫前中書舍人鄭居中國子司業
裴惲河南少尹李道樞倉部郎中崔晉司封
員外郎張可續駕部員外郎盧言虞部員外
郎苗愔和州刺史裴儔淄州刺史裴洽檢校

禮部員外郎楊魯士四門博士談弘謩等一
十五人合宴于舟中由斗亭歷魏隄抵津橋
登臨沂泐自晨及暮簪組交映歌笑間發前
水嬉而後妓樂左筆硯而右壺觴望之若仙
觀者如堵盡風光之賞極遊泛之娛美景良
辰賞心樂事盡得于今日矣若不記錄謂洛
無人晉公首賦一章鏗然玉振顧謂四座繼
而和之居易舉酒抽毫奉十二韻以獻

座上作

三月草萋萋黃鶯歇又啼柳橋晴有絮沙路潤無泥襖
事修初畢遊人到欲齊金鈿耀桃李絲管駭鳬鷺轉岸
迴船尾臨流簇馬蹄鬧翻揚子渡蹋破魏王隄妓接謝
公宴詩陪荀令題舟同李膺汎醴為穆生攜水引春心
蕩花牽醉眼迷塵街從鼓動煙樹任鴉棲舞急紅腰凝
歌遲翠黛低夜歸何用燭新月鳳樓西

同夢得暮春寄賀東西川二楊尚書

龍節對持真可愛雁行相接更堪誇兩川風景同三月

千里江山屬一家，魯衛定知連氣色。
潘楊亦覺有光華。

予與二公皆忝姻眷應憐洛下分司伴，冷宴閒遊老看花。

喜小樓西新柳抽條

一行弱柳前年種，數尺柔條今日新。
漸欲拂他騎馬客，未多遮得上樓人。
須教碧玉羞眉黛，莫與紅桃作麴塵。
為報金隄千萬樹，饒伊未敢苦爭春。

酒醒尋夢得

料合同惆悵，花殘酒亦殘。
醉心忘老易，醒眼別春難。
獨

出雖慵懶相逢定喜歡還攜小蠻去試覓老劉看

小蠻酒榼

名也

感事

服氣崔常侍

晦叔

燒丹鄭舍人

居

常期生羽翼那忽化灰

塵每遇淒涼事還思潦倒身
唯知趣杯酒不解鍊金銀
睡適三尸性慵安五臟神
無憂亦無喜六十六年春

和裴令公南庄一絕

裴云野人不識中書令喚作陶家與謝家

陶廬僻陋那堪比謝墅幽微不足攀
何似嵩峰三十六

長隨申甫作家山

宅西有流水牆下構小樓臨翫之時頗有幽趣

因命歌酒聊以自娛獨醉獨吟偶題五絕

伊水分來不自由
無人解愛為誰流
家家拋向牆根底
唯我栽蓮越小樓

水色波文何所似
麴塵羅帶一條斜
莫言羅帶春無主
自置樓來屬白家

日灩水光搖素壁
風飄樹影拂朱欄
皆言此處宜絃管

試奏霓裳一曲看

霓裳試罷唱梁州紅袖斜翻翠黛愁應是遙聞勝近聽
行人欲過盡迴頭

獨醉還須得歌舞自娛何必要親賓當時一部清商樂
亦不長將樂外人

偶作

藍舁出即忘歸舍柴戶昏猶未掩關聞客病時慙體健
見人忙處覺心閒清涼秋寺行香去和暖春城拜表還

木雁一篇須記取，致身才與不才間。

同夢得酬牛相公初到洛中小飲見贈

時牛相公辭罷

揚州節度就拜東都留守

淮南揮手拋紅旆，洛下迴頭向白雲。
政事堂中老丞相，制科場裏舊將軍。
宮城煙月饒全占，關塞風光請半分。
詩酒放狂猶得在，莫欺白叟與劉君。

幽居早秋閒詠

幽僻驚塵外，清涼水木間。
臥風秋拂簟，步月夜開關。
且

得身安泰從他世險艱但休爭要路不必入深山軒鶴
留何用泉魚放不還誰人知此味臨老十年間

和令狐僕射小飲聽阮咸

掩抑復淒清非琴不是箏還彈樂府曲別占阮家名古
調何人識初聞滿座驚落盤珠歷歷搖珮玉琤琤似勸
杯中物如含林下情時移音律改豈是昔時聲

燒藥不成命酒獨醉

白髮逢秋玉丹砂見火空不能留姹女爭免作衰翁賴

有杯中綠能為面上紅少年心不遠只在半酣中

送廬郎中赴河東裴令公幕

別時暮雨洛橋岸到日涼風汾水波
荀令見君應問我為言秋草閉門多

送李滁州

君於覺路深留意我亦禪門薄致功
未悟病時須去病已知空後莫依空
白衣臥病嵩山下皁蓋行春楚水東
誰道三年千里別兩心同在道場中

長齋月滿寄思黯

一日不見如三月一月相思如七年似隔山河千里地
仍當風雨九秋天明朝齋滿相尋去挈榼抱衾同醉眠
冬夜對酒寄皇甫十

霜殺中庭艸冰生後院池有風空動樹無葉可辭枝十
月苦長夜百年強半時新開一瓶酒那得不相思

歲除夜對酒

衰翁歲除夜對酒思悠然艸白經霜地雲黃欲雪天醉

依香枕坐慵傍暖爐眠洛下閒來久明朝是十年

白氏長慶集卷三十三